

ներ, եւ դրա համար միաբանութիւնը մի քանի դասերի եր բաժանած, որոնք հերթով փոխուում էին: Եւ այդպէս, աղօթքն ու պաշտամունքը եկեղեցում օր ու գիշեր մտում էր անխզելի եւ երբեք չէր ընդհատուում: Իսկ այն գիշերը, շաբաթոյ գիշեր լինելով, ամբողջ միաբանութիւնը «հսկում» էր կատարում, այսինքն՝ անքուն պիտի աղօթէր մինչեւ լոյս: Այդ կարգի արեղաներին հին ժամանակներում յունական անունով կոչում էին «սպուղե» (անխոնջ), իսկ նրանց վանքը՝ «Անհանգստից» վանք: Ի՞նչ հանգստութիւն էինք որոնում մենք «անհանգիստների» վանքում...

Առաւօտեան ժամը վերջանալուց յետոյ ես եւ Ասլանը գնացինք վանահօր աջը համբուրելու եւ նրան հրաժարական ողջոյն տալու: Նրան միայնակ գտանք իր անշուք խուցի մէջ նստած եւ ինչ-որ գրում էր: Նա թէւ խիստ բարեսրտութեամբ ընդունեց մեզ, բայց մենք կարճ կտրեցինք եւ, ոտքի վրայ շնորհակալութիւն յայտնելով՝ դուրս եկանք:

Ուրիշ վանքերում միաբանները, իրանց այցելուներից նիւթական ակնկալութիւններ ունենալով, վերին աստիճանի քաղաքավարի եւ մինչեւ անգամ շողոքորթող են լինում: Բայց այդ, աշխարհից անջատուած, անընչասէր անապատականները ոչ միայն սառն էին վարում, այլ խորշում էին մեղքի աշխարհի մարդիկներից: Այդ խորշանքը հասնում էր նրանց մէջ մինչեւ մարդատեցութեան: Իգական սեռին բոլորովին արգելուած էր այդ կղզին մտնել, իսկ արական սեռից մուտք են գործում հասակաւորները միայն:

Մենք վերջին անգամ հայեացք ձգեցինք «Անհանգստից» վանքի վրայ եւ հեռացանք:

– Ինչպե՞ս երեւաց թեզ այդ վանքը, – հարցրի Ասլանից:

– Անապատական մոլեռանդութիւնը, ճգնաւորական կեանքը, – ասաց նա, – այլանդակեց մեր վանական կարգերը, որոնք, իրաւ, իրանց ժամանակին ունեցել են իրանց մէջ շատ մարդասիրական սկզբունքներ: Անապատականների շնորհիւ ինչպէս մեր վանական կեանքը այլանդակոտեցաւ, այնպէս էլ այլանդակոտեցաւ եւ հայկական գեղեցիկ ճարտարապետութիւնը, որ պահպանուած էր գլխաւորապէս վանքերի շինածքների մէջ: Աղքատութիւն եւ անշքութիւն սիրելով, անապատականները բաւականացան անշուք խցիկներով եւ, խստակեցութեամբ սպանելով իրանց մարմինը, սպանեցին միեւնոյն ժամանակ եւ արհեստը: Նայեցէք, ինչ բանի են նման այդ ողորմելի շինածքները, այդ տխո՛ւր անապատը...

Բերգէն-օղլուն՝ մեր հիւրընկալ արեղայի հետ՝ գտանք ծովի ափի մօտ: Այնտեղ պատրաստ էր վանքի նաւակը, որ մեզ պիտի տաներ դէպի ցամա-